



Број/Број: 01/4-50-1-4-42/09
Сарајево/Sarajevo, 17.3.2009. godine

Z A P I S N I K

42. sjednice Komisije za finansije i budžet Predstavničkog doma Parlamentarne skupštine BiH

održane 16.3.2009. godine, u vremenu od 13 do 14,30 sati.

Sjednici Komisije prisustvovali su članovi: Sadik Bahtić, Lazar Prodanović, Velimir Jukić, Adem Huskić, Salko Sokolović, Bajazit Jašarević, Savo Erić i Drago Kalabić.

Sjednici nije prisustvovao Zlatko Lagumdžija, član Komisije.

Sjednici su također prisustvovali: Ranko Šakota, pomoćnik ministra za trezor, i Vlatko Dugandžić, pomoćnik ministra za budžet iz Ministarstva finansija i trezora BiH, Nikola Deretić, predsjedavajući UO, i Sadija Hodžić, finansijski direktor iz BHRT-a, Ahmet Turčinović, predsjednik, i Predrag Crnogorac, zamjenik predsjednika Sindikata GP, Jure Bilić, predsjednik UO, i Munevera Radović, tehnički sekretar SDPS-a, Amer Tockić, predsjednik Sindikata grafičkih, izdavačkih i medijskih radnika BiH, Muhamed Hrlović, direktor Štamparije „BLIC DRUK“, Zoran Brkić, viši stručni saradnik iz Sektora za odnose s javnošću Sekretarijata PSBiH, te Željko Kosmajac, sekretar, i Muhameda Abaz, stručni saradnik pri Komisiji.

Od predstavnika medija sjednici su prisustvovali: Jasna Fatahović-Oslobođenje i Hatka Nezirević-BHT1.

Za sjednicu je predložen sljedeći

DNEVNI RED

1. Usvajanje zapisnika 37., 38., 39. i 40. sjednice Komisije;
2. Razmatranje Prijedloga zakona o izmjenama i dopunama Zakona o finansiranju institucija BiH – prva komisijska faza (predlagač: Vijeće ministara BiH);
3. Razmatranje Izvještaja o finansijskom poslovanju Radio-televizije BiH u 2007. godini (sačinilac: menadžment BHRT-a);
4. Razmatranje Izvještaja o radu Ministarstva finansija i trezora BiH za 2008. godinu;
5. Tekuća pitanja:
 - a) Dopis Sindikata grafičkih, izdavačkih i medijskih radnika BiH u vezi sa izradom Prijedloga zakona o javnim nabavkama BiH, zaprimljen 29.1.2009.;
 - b) Dopis Samostalnog sindikata državnih i policijskih službenika i zaposlenika u institucijama BiH, sudskoj vlasti i javnim ustanovama BiH u vezi s primjenom Zakona o porezu na dohodak zaposlenih u institucijama BiH, zaprimljen 29.1.2009.;
 - c) Dopis Sindikata Granične policije u vezi s Odlukom Vijeća ministara BiH o visini, načinu i postupku ostvarivanja prava na naknadu za prijevoz na posao i prijevoz s posla u institucijama BiH, zaprimljen 25.2.2009.

Prije usvajanja dnevnog reda, intervenciju za njegovu izmjenu imao je Drago Kalabić.

Drago Kalabić imao je dilemu da li tačka 3. i podtačka c) tačke 5. dnevnog treba da budu predmet razmatranja na sjednici. U prilog tome naveo je da Izvještaj o finansijskom poslovanju BHRT-a za 2007. nije usvojio Upravni odbor BHRT-a, te da je Komisija u pogledu tog izvještaja ranije zauzela stav, a o podtački c) tačke 5. dnevnog reda naveo je da konačnu ocjenu treba dati Vijeće ministara BiH.

Predsjedavajući Komisije upozorio je na dopis Kolegija Predstavničkog doma, kojim se od ove komisije i Komisije za saobraćaj i komunikacije zahtijeva ponovno razmatranje Izvještaja o finansijskom poslovanju BHRT-a za 2007.godinu uz prisustvo relevantnog predstavnika UO BHRT-a, te izvještavanje Doma o zauzetom stavu i predloženim odgovarajućim mjerama. Podržao je stav o skidanju s dnevnog reda tačke 3., dok je u pogledu podtačke c) tačke 5. dnevnog reda bio mišljenja da je potrebno da Komisija da određene smjernice ili zaključke, jer Vijeće ministara BiH nije postupilo u skladu sa zakonskom rokom od 60 dana za izradu podzakonskih akata Zakona o plaćama i naknadama u institucijama BiH i nije sačinilo analizu njegove primjene u zakonom određenom roku od šest mjeseci.

Savo Erić podržao je skidanje s dnevnog reda tačke 3. predlažući da UOBHRT-a pripremi izvještaj o finansijskom poslovanju za 2008.godinu pa da se onda skupa razmatraju ova dva izvještaja.

Velimir Jukić ukazao je na besmislenost razmatranja dokumenta koji nije usvojilo nadležno tijelo njegove kuće, dok tačku vezanu za Zakon o plaćama i naknadama u institucijama BiH Komisija treba otvoriti i i usmjeriti u odgovarajućem pravcu.

Nikola Deretić, predsjedavajući UOBHRT-a, predstavio je novog finansijskog direktora BHRT-a, te zamolio da Komisija odredi rok u kojem će BHRT dostaviti Izvještaj o finansijskom poslovanju za 2008.godinu, kao i rok za dostavu Plana sanacije i konsolidacije sačinjenog na bazi realno procijenjenog finansijskog stanja BHRT-a.

Sadija Hodžić, finansijski direktor BHRT-a, izjasnila se da Izvještaj o finansijskom poslovanju BHRT-a za 2008.godinu može biti sačinjen do kraja marta, a sanacioni plan do kraja aprila 2009. godine.

Bajazit Jašarević sugerirao je da se predloženi dnevni red sjednice ne mijenja, te da se u okviru tačke 3. dnevnog reda, na osnovu prethodne rasprave utvrde komisijski zaključci.

Nakon kraće rasprave, izmjene dnevnog reda nije bilo, te je jednoglasno usvojen u predloženom obliku.

Ad.1. Usvajanje zapisnika 37., 38., 39. i 40. sjednice Komisije

Zapisnici 37., 38., 39. i 40. sjednice Komisije usvojeni su jednoglasno, bez primjedbi.

Ad.2. Razmatranje Prijedloga zakona o izmjenama i dopunama Zakona o finansiranju institucija BiH, prva komisijska faza (predlagač: Vijeće ministara BiH)

I. komisijska faza

U uvodu ove tačke dnevnog reda **predsjedavajući Komisije** naveo je da je Vijeće ministara BiH, 25.2.2009., dostavilo Prijedlog zakona o izmjenama i dopunama Zakona o finansiranju institucija BiH (u daljnjem tekstu: Prijedlog zakona) u parlamentarnu proceduru na razmatranje po osnovnom zakonodavnom postupku, a zatim riječ dao predlagaču, radi obrazlaganja Prijedloga zakona.

Vlatko Dugandžić, pomoćnik ministra za budžet, naveo je da se ovim prijedlogom zakona mijenjaju i dopunjavaju odredbe postojećeg Zakona o finansiranju institucija BiH nastale kroz primjenu Zakona o Fiskalnom vijeću BiH, Zakona o internoj reviziji, Zakona o plaćama i naknadama u institucijama BiH, Zakona o uplatama na Jedinostveni račun i raspodjeli prihoda i druge zakone, a sve s ciljem sistemskog uređenja finansiranja institucija BiH. Ministarstvo finansija i trezora BiH je u posljednje tri-četiri godine provodilo reformu finansiranja institucija BiH (reformu budžetskog procesa) i u tom procesu javila se potreba za intervencijom u dijelu Zakona o finansiranju institucija BiH, prvenstveno radi stvaranja pretpostavki programskog budžetiranja i bržeg protoka budžetskog procesa (usvajanje preliminarog nacrta budžeta). Ukazao

je na problem kašnjenja usvajanja budžeta institucija BiH u posljednje dvije godine, gdje je izlaz bilo privremeno finansiranje. Prijedlogom izmjena i dopuna mijenja se član 5. Zakona o finansiranju institucija BiH na način da osnov za usvajanje Dokumeta okvirnog budžeta sada čini srednjoročni okvirni plan prihoda i rashoda, koji usvaja Fiskalno vijeće s ciljem ubrzanja budžetskog procesa. Također predloženim izmjenama i dopunama zakona harmoniziraju se budžetski kalendari i rokovi budžetskih kalendara na svim razinama vlasti s ciljem stvaranja programskog budžetiranja.

Lazar Prodanović naveo je da je Ustavnopravna komisija Predstavničkog doma utvrdila postojanje ustavnog osnova za Prijedlog zakona, te otvorio raspravu o zakonskom prijedlogu.

Izjašnjavanje o principima Prijedloga zakona

Kako nije bilo prijavljenih za raspravu, predsjedavajući Komisije zatražio je izjašnjavanje članova Komisije o principima Prijedloga zakona, te konstatirao da je Komisija, sa sedam glasova „za“ i jednim „suzdržanim“ glasom, usvojila Prijedlog zakona u prvoj komisijkoj fazi, te ga uputila u daljnju zakonodavnu proceduru.

Ad.3. Razmatranje Izvještaja o finansijskom poslovanju Radio-televizije BiH u 2007. godini (sačinilac: menadžment BHRT-a)

U smislu rasprave vođene prilikom usvajanja dnevnog reda sjednice, u okviru ove tačke dnevnog reda Komisija nije razmatrala Izvještaj o finansijskom poslovanju Radio-televizije BiH u 2007. godini, koji je sačinio menadžment BHRT-a, ali je u vezi s njim utvrdila i jednoglasno usvojila **dva zaključka**, te ih uputila Predstavničkom domu na usvajanje, kako slijedi:

„1. Predstavnički dom Parlamentarne skupštine BiH traži od menadžmenta i Upravnog odbora Radio-televizije BiH da do kraja aprila 2009. godine sačine i dostave Izvještaje o finansijskom poslovanju Radio-televizije BiH za 2007. i 2008. godinu.

2. Predstavnički dom Parlamentarne skupštine BiH traži od Upravnog odbora Radio-televizije BiH da do kraja aprila 2009. godine dostavi Predstavničkom domu plan sanacije i konsolidacije Radio-televizije BiH.“

Ad.4. Razmatranje Izvještaja o radu Ministarstva finansija i trezora BiH za 2008. godinu

U uvodu ove tačke dnevnog reda **predsjedavajući Komisije** naveo da je Vijeće ministara BiH, 12.2.2009. godine, dostavilo Parlamentarnoj skupštini BiH Izvještaj o radu Vijeća ministara BiH za 2008. godinu u kojem su objedinjeni pojedinačni izvještaji o radu ministarstava Bosne i Hercegovine za 2008. godinu.

U skladu s dopisom Kolegija Predstavničkog doma, od 19.2.2009. , Komisiji je dostavljen Izvještaj o radu Vijeća ministara BiH za 2008. godinu, sa zaduženjem da razmotri pojedinačne izvještaje o radu ministarstava za koja je nadležna, te Predstavničkom domu dostavi mišljenje o navedenim izvještajima.

Shodno tome, Komisija je bila nadležna za razmatranje Izvještaja o radu Ministarstva finansija i trezora BiH, čiji predstavnici nisu imali potrebu za obrazlaganjem Izvještaja, pa je otvorena rasprava.

Bajazit Jašarević istakao je da Ministarstvo finansija i trezora BiH pripada grupi ministarstava koja prednjače u izvršavanju zakonskih obaveza. Interesiralo ga je da li bi se uskoro u zakonskoj proceduri mogao naći Zakon o akcizama, s obzirom na činjenicu da su i javnost i stručnjaci svjesni potrebe njegovog donošenja. Također ga je interesiralo da li Ministarstvo finansija i trezora BiH ima strategiju za rješavanje problema u vezi sa Zakonom o staroj deviznoj štednji (različita entitetska rješenja, stav Ustavnog suda BiH, izmjene i dopune zakona, pokušaj prolongiranja roka verifikacije i dr.).

Savo Erić naveo je da bi se novim prijedlogom zakona o javnim nabavkama, koji je u proceduri, mogli otkloniti nedostaci i nepravilnosti koji se ponavljaju u revizorskim izvještajima. Mišljenja je da bi Vijeće ministara BiH trebalo razmatrati sve zakone vezane za protok i raspodjelu novca, kako bi se jednim paketom mjera mogli otkloniti uočeni nedostaci do kraja poslaničkog mandata. Ukazao je na neophodnost rješavanja problema stare devizne štednje. Smatra da bi u nastaloj recesiji trebalo sagledati promjene stopa PDV-a kako bi se pomoglo privrednicima, jer će biti kasno o tome diskutirati kad se privreda ugasi.

Velimir Jukić naveo je činjenicu da su obveznice za staru deviznu štednju u Republici Srpskoj već emitirane dok u Federaciji BiH to nije slučaj. O tom pitanju Ustavni sud BiH zauzeo je stav koji se treba prihvatiti, a i parlamentarna ad hoc komisija zadužena za ovu problematiku predložit će određena rješenja. Ukazao je da će javnost u nastalim okolnostima od ove komisije i nadležnog ministarstva očekivati da učine sve što je moguće u okviru postojećih ustavnih nadležnosti, kako bi posljedice recesije bile što blaže.

Lazar Prodanović naveo je da bi Ministarstvo finansija i trezora BiH trebalo da uzme aktivnu ulogu u vezi s Prijedlogom zakona o Garancijskom fondu i Prijedlogom zakona o finansijskom lizingu, a posebno izmjenama i dopunama Zakona o sistemu indirektnog oporezivanja u dijelu otklanjanja ograničenja za promjene stopa PDV-a bez saglasnosti UOUIO, jer je, prema važećem zakonskom rješenju, data supremacija izvršne nad zakonodavnom vlašću.

Ranko Šakota, pomoćnik ministra za trezor, informirao je Komisiju da je Nacrt zakona o akcizama dostavljen Vijeću ministra BiH, te da će, nakon razmatranja u Vijeću ministara BiH, biti dostavljen u parlamentarnu proceduru sa zahtjevom da se razmatra po ubrzanoj proceduri.

Po pitanju stare devizne štednje, izjasnio se da je Ministarstvo finansija i trezora BiH u okvirima svoje nadležnosti ponudilo određeni model rješavanja u skladu sa Zakonom o dugu, zaduživanju i garancijama BiH, koji nije podržan do kraja. Stav Ministarstva je da se ovaj problem mora rješavati kako u pogledu štednje kod domicilnih banaka, tako i štednje u Ljubljanskoj banci, što do sad uopće nije rješavano.

Promjena stopa PDV-a u BiH vrlo je osjetljivo i teško pitanje. Mnoge evropske zemlje snižavaju stope PDV-a s ciljem podsticanja tražnje kao jednog od načina izlaska iz krize. Primjena takvog modela u BiH ne bi postigla očekivane efekte s obzirom da bi se kod nas podsticanjem tražnje povećao uvoz, jer ne postoji domaća proizvodnja. Mišljenja je da postojeći sistem PDV-a ne bi trebalo da se mijenja, a da će Ministarstvo otvoriti pregovore s MMF-om i Svjetskom bankom o prevazilaženju krizne situacije i u BiH.

Nakon kraće rasprave, članovi Komisije jednoglasno su prihvatili Izvještaj o radu Ministarstva finansija i trezora BiH za 2008. godinu, te ga uputili u daljnju parlamentarnu proceduru, s prijedlogom Domu za usvajanje.

Ad.5. Tekuća pitanja

a) Dopis Sindikata grafičkih, izdavačkih i medijskih radnika BiH-SGIM-a BiH u vezi sa izradom Prijedloga zakona o javnim nabavkama BiH, zaprimljen 29.1.2009.

Kako je dopis SGIM-e BiH vezan za novi Prijedlog zakona o javnim nabavkama BiH, **predsjedavajući** je predstavnike Sindikata uputio na održanu javnu raspravu o Prijedlogu zakona, na kojoj je trebalo da učestvuju i iznesu svoje primjedbe.

Amer Toskić, predsjednik SGIM-e BiH, naveo da javnoj raspravi nisu prisustvovali zbog neobaviještenosti, te tražio da mu se omogući da svoje primjedbe Komisiji dostavi do kraja marta 2009. godine. Istakao je da se Sindikat obraćao Agenciji za javne nabavke BiH i Uredu za razmatranje žalbi, koji, u pogledu novog zakonskog prijedloga o javnim nabavkama, imaju suprotstavljene stavove

Bajazit Jašarević je, polazeći od pretpostavke da je osnova dopisa SGIM-e BiH reguliranje preferencijalnog tretmana novim zakonskim odredbama, citirao je čl. 63. novog prijedloga zakona o javnim nabavkama, navodeći: „Preferencijalni tretman za domaće ponuđače, odnosno ponude primjenjuje se u mjeri koja će se definirati posebnim pravilnikom koji će donijeti Vijeće ministara BiH u roku od 30 dana od dana stupanja na snagu ovog zakona.“

Istakao je da novi zakonski prijedlog predstavlja dovoljan okvir da u skladu s direktivama EU potiče domaću proizvodnju, a da će bliže definiranje preferencijalnog tretmana biti uređeno podzakonskim aktom Vijeća ministara BiH. Stoga je predstavnike SGIM-e BiH uputio na Vijeće ministara BiH ili resorno ministarstvo, kao adresu kojoj treba da se obrate u vrijeme izrade podzakonskog akta, kako bi im bio omogućen maksimalno povoljan tretman za domaću proizvodnju.

Lazar Prodanović naveo je da BiH mora imati zakon o javnim nabavkama koji je usklađen s direktivama EU.

Ranko Šakota, pomoćnik ministra za trezor, naveo je da je preferencijalni tretman za domaće u članu 37. važećeg Zakona o javnim nabavkama BiH definiran i moguć samo u mjeri u kojoj to dopuste pozakonski akti koje je predlagalo Vijeće za javne nabavke, dok je ovo pitanje također posebno regulirano članom 75. Sporazuma o stabilizaciji i pridruživanju, kojim su decidirano predviđene obaveze BiH u smislu prilagođavanja preferencijalnog tretmana u prijelaznom periodu, koji je počeo 2008. godine. Preferencijalni tretman domaćeg je u prvoj godini prijelaznog perioda maksimalno iznosio 15%, te bi za nekih šest-sedam godina trebalo da se snizi na 0%. U vrijeme pregovaranja o navedenom sporazumu, Vijeće ministara BiH je, na prijedlog Agencije za javne nabavke BiH, prihvatilo 10% preferencijalnog tretmana za domaće u prvoj godini, što je nepovoljnije u odnosu na rješenje koje je u pregovorima uspio dobiti bh.tim u Sporazumu o stabilizaciji i pridruživanju.

Savo Erić predložio je da se ubuduće mediji obavijeste o svim zakonima koji su proceduri kako bi javnost bila upoznata.

Velimir Jukić naveo je da predstavnici SGIM-e BiH, iako nisu prisustvovali javnoj raspravi, još uvijek nisu zakasnili da iznesu i obavijeste Komisiju o svojim primjedbama i sugestijama na novi Prijedlog zakona o javnim nabavkama, te pozvao predstavnike da to učine u roku od deset dana koliko još traje amandmanska faza za Prijedlog zakona.

Predsjedavajući Komisije zaključio je ovu podtačku pozivom predstavnicima SGIM-e BiH da dostave svoje prijedloge i sugestije na Prijedlog zakona o javnim nabavkama do kraja amandmanske faze, zaključno sa 26.3.2009.

b) Dopis Samostalnog sindikata državnih i policijskih službenika i zaposlenika u institucijama BiH, sudskoj vlasti i javnim ustanovama BiH-SPDS u vezi s primjenom Zakona o porezu na dohodak zaposlenih u institucijama BiH, zaprimljen 29.1.2009.

Jure Bilić, predsjednik UOSPDS-a, naveo je da je ovaj put SPDS reagirao zbog primjene entitetskih zakona o porezu na dohodak kojim se zaposlenici na istom radnom mjestu u institucijama BiH dovode u neravnopravna položaj u pogledu iznosa plaće, s obzirom na entitetsko prebivalište. Interesiralo ga je da li se može navedena neravnopravnost zaposlenika riješiti na državnom nivou. Također je naveo da je u januaru 2009. ova komisija donijela zaključak kojim je obavezala Vijeće ministara BiH da u roku od mjesec dana sačini analizu primjene Zakona o plaćama i naknadama u institucijama BiH, za koju SPDS nema saznanje da li je uopće sačinjena, a u čiju izradu Sindikat nije uključen.

S obzirom da Zakon o porezu na dohodak ne postoji na državnom nivou, **Ranko Šakota, pomoćnik ministra za trezor**, naveo je da je Ministarstvo finansija i trezora BiH pri oporezivanju dohotka primijenilo različite entitetske zakone koji reguliraju tu oblast i koji su međusobno disharmonizirani. Kao rezultat toga javila se pomenuta neravnopravnost među zaposlenicima u institucijama BiH. Entitetskim zakonskim rješenja uvode se kategorijalne promjene, te „netoplaća“ kao kategorija više ne postoji, nego samo kategorija „ukupna primanja“ i kategorija „brutoplaća“ iz koje svaki zaposlenik preko poslodavca plaća doprinose. Step en opterećenja brutoplaće zaposlenika doprinosima i porezima je različit, shodno tome iz kojeg entiteta dolaze. Nastalu neravnopravnost nije moguće riješiti u postojećem sistemu, osim ukoliko se ne pokrene usklađivanje propisa. Državno ministarstvo je s predstavnicima nadležnih entitetskih ministarstava pokrenulo inicijativu, te predložilo izmjene određenih članova Zakona o porezu na dohodak FBiH, kako bi se našao izlaz iz ove situacije.

Naveo je da se slična situacija desila i s naknadama za porodijsko odsustvo, koje su također shodno entitetskom prebivalištu različite među ženama zaposlenim u institucijama BiH. Na tragu rasprave o tom problemu, u Parlamentu FBiH pokrenute su izmjene i dopune zakona koji regulira naknade za porodijsko odsustvo, te je predloženo rješenje da i zaposlenice s područja FBiH primaju 100% naknadu plaće u vrijeme porodijskog odsustva.

Naveo je da je u završnoj fazi izrada druge analize primjene Zakona o plaćama i naknadama u institucijama BiH. Jedan od uočenih problema tiče se raspoređivanja koeficijenata za platne razrede zaposlenika sa SSS od strane rukovodioca institucije, što je kod većine institucija rezultiralo

maksimalnim koeficijentima za zaposlenike ove stručne spreme. Morat će se pokrenuti izmjene i dopune zakona, kako bi se rukovodioci institucija usmjerili oko raspodjele koeficijenata za zaposlenike SSS-a. Također u Zakonu o plaćama i naknadama javili su se određeni propusti navodeći neidentificiranje posebnog dodatka za zaposlene u Institutu za nestala lica BiH. Također, Analiza će pokazati zaobilaženje zakonskih rješenja u oblasti plaća i naknada od strane Ustavnog suda BiH, ostalih institucija BiH u oblasti pravosuđa, te Ureda za reviziju institucija BiH. Odgovorio je da je Vijeće ministara BiH na izradu Analize primjene Zakona o plaćama i naknadama u institucijama BiH zakonski obavezano.

c) Dopis Sindikata Granične policije u vezi s Odlukom Vijeća ministara BiH o visini, načinu i postupku ostvarivanja prava na naknadu za prijevoz na posao i prijevoz s posla u institucijama BiH, zaprimljen 25.2.2009.

Ahmet Turčinović, predsjednik Sindikata GP, naveo je da Vijeće ministara BiH nije u zakonskom roku donijelo podzakonske akte za obračun naknada za odvojeni život i stanarinu, dok je podzakonski akt za obračun troškova prijevoza donijelo sa zakašnjenjem od tri mjeseca. Naveo je da su rješenja sadržana u članu 3. Odluke o visini, načinu i postupku ostvarivanja prava na naknadu za prijevoz na posao i prijevoz s posla u institucijama BiH relativno prihvatljiva u dijelu koji se odnosi na obračun i isplatu naknada za zaposlene čije je mjesto rada udaljeno do 80 km, dok je način obračuna i isplate naknade za prijevoz iz stava (4) istog člana izuzetno neprihvatljiv, neodrživ i diskriminatorske prirode, a posebno za oko 800 policijskih službenika GP, koji od mjesta prebivališta do mjesta rada u prosjeku putuju više od 200 km, a kojim pripada pravo na mjesečnu novčanu naknadu u visini osam pojedinačnih karti javnog prijevoznika. Kao posljedicu nedonošenja podzakonskih akata u zakonskim rokovima, naveo je primjenu dosadašnji internih pravilnika u institucijama BiH. Poznato mu je da Vijeće ministara BiH stoji na stanovištu da je napravljen propust, te se nada da će se naći rješenje na obostrano zadovoljstvo. Predložio je da bi i Komisija trebala inicirati rješavanje navedenog problema.

Predsjedavajući Komisije naveo je da podržava stav predstavnika sindikata, koji bi trebalo da održe sastanak s predstavnicima Vijeća ministara BiH i riješe navedeni problem.

Ranko Šakota, pomoćnik ministra za trezor, naveo je se ovo pitanje ne odnosi samo na GP, nego i na sve druge institucije kod kojih je rad organiziran u smjenama (zaposleni u UIO, čuvari zgrade itd.). Složio se da ovom problemu treba posvetiti pažnju i naći adekvatno rješenje s tim da se moraju postaviti granice da naknada za prijevoz ne može biti veća od naknade za smještaj. Naveo je da je UIO imala drugačiji pristup ovom problemu od GP, iz čega se zaključuje da su ranije postojala različita rješenja. Primjenu internih propisa do donošenja podzakonskih akata pravdao je zakonskom formulacijom, te naveo da nije siguran da će podzakonski akti donijeti bolja rješenja u odnosu na postojeća.

Sekretar Komisije
Željko Kosmajac

Predsjedavajući Komisije
mr. ecc.sc. Sadik Bahtić